

Date – 15/01/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Governor thar tur, Gen. (Dr.) Vijay Kumar Singh-an vawiin khan Mizoram a rawn thleng a, naktuk ah rinawmna thu tiam tira lakluh a ni ang.
2. Covid hri len hnuah Mizoramah khualzin an pun nasat thu Tourism Dept chuan a sawi.
3. Prime Minister Narendra Modia chuan India-in chuan ramzauhna lam aiin hmasawmna rilrua neiin hna a thawk a ti.
4. Vawiin Sipaite ni Army Day-ah President Droupadi Murmu, Prime Minister Narendra Modi, leh Chief of Defence Staff General Anil Chauhan te chuan ramchhung sipaite leh an chhungte duhsakna chibai an bu.



NEW GOVERNOR ARRIVED

Governor thar tur, Gen. (Dr.) Vijay Kumar Singh-an vawiin khan Mizoram a rawn thleng a, naktuk chawhma dar 11ah Raj Bhavan Circular Lawn-ah Gauhati High Court Chief Justice Vijay Bishnoi an Mizoram Governor 25-na ni tura rinawmna thu tiam tirin a la lut ang.

Pu VK Singh-a hi a nupui Pi Bharti Singh nen lo kalin, Chief Minister Pu Lalduhoma chuan Lengpui Airport-ah anmahni lawmna leh hmuahna hun a buatsaih a, a hmuahnaah hian Chief Minister Pu Lalduhoma leh a nupui Pi Liansailovi, Speaker Pu Lalbiakzama, Home Minister Pu K. Sapdanga, Chief Secretary Pu Khilli Ram Meena, DGP Pu Anil Shukla leh Official pawimawh dangte an tel a, hemi hnu hian Raj Bhavan panpui nghal a ni.

Mizoram Larsap thar tur General VK Singh hi Indian Army Chief of Army Staff hlui niin he dinhmun hi kum 2010 atanga 2012 chhung a chelh a, four star General niin Indian Army hotu hmingtha tak a ni a. A hna atanga a chawlh hnuin BJP Party a zawmin Member of Parliament a ni tawh a. Ministry of Road Transport and Highways leh Ministry of Civil Aviation changtu Minister of State dinhmun chelh tawhin Hemi hma hian Minister of State for External Affairs,

Minister of State (Independent Charge) for Development of the North-Eastern Region leh Minister of State for Statistics and Programme Implementation a ni tawh bawk a ni.

Governor thar tur Pu Vijay Kumar Singh hian Mizoram a pan hma vawiin chawhma lam khan Kamakhya Temple, Guwahati a tlawh a, inpekna, rinawmna leh inngaihtlawmna nena Mizoram mipuite rawng a bawl sak theih nan malsawmna a dil a ni.

<><><>

CM

Chief Minister Pu Lalduhoma chuan vawiin khan a pisa ah NBCC Executive Director, Head of Business Development Pu Pradeep Sharma a kawm a. Serchhip kiang Mat lui Multipurpose Dam thawh dan tur sawipuiin, a 3D model siam an thlirho.

NBCC hotute sawi danin Mat lui chu state sawrkar sum leh pai seng lo va an thawh theih an beisei a, a thawhna sum hnar an dap zel dawn tih sawiin an hmu thei a nih chuan hna thawh chung chu a rei dawnlo tih an sawi.

An inkawmna ah hian NBCC Executive Director hian India ram hmun danga an hnathawh thenkhat Chief Minister hmaah hian a sawifiah bawk.

<><><>

MZU UG RESULT DECLARED

Mizoram University-a Choice Based Credit System (CBCS) Scheme hnuuia 5th semester regular leh repeater Odd, 2024, nikum November leh December inkar chungha exam result a ti chhuak a. Result chhuak te hi kum 2020 leh 2021-a 1st, 3rd leh 5th semester batch te an ni.

Bachelor of Arts (BA) exam pass thar hi mi 5476 niin zaa 78.80 an pass a, Bachelor of Science (B.Sc.) ah mi 615 pass in zaa 72.52 an pass a. Bachelor of Commerce-ah mi 314 pass in zaa 93.73 an pass a, Bachelor of Science (Home Science) bikah mi 12 pass in zaa 70.59 an pass a ni.

Exam tura inziak lut mi 8,474 zinga mi 8,149 in exam an hmachhawn a, mi 6417 an pass a, pass zawng zawng zat hi zaa 78.75 an pass a ni.

Mizoram University hotute chuan kum 2023 atangin Mizoram University in NEP 2020 a hman tak avangin hemi kum atang hian CBCS-ah 1st semester atangin regular an awm thei dawn lo tih an sawi a. NEP 2020 hnuuia 1st leh 3rd semester (regular leh repeater) result chu tihchhuah leh thuai an tum tih an sawi.

<><><>

TOURISM

Tourism Department Deputy Director Pi Rachel Lalrinhlui chuan Covid hri len hnuah Mizoramah khualzin an pun nasat thu a sawi.

Pi Rachel Lalrinhlui chuan tourism lama hmasawmna ruhrel leh mipuite hrilhhriatna kawnga hma an lak nasat avangin khualzin an pun thu a sawi a. Reiek, Hmuifang leh Thenzawl chu khualzin ten an tlawh nasat thu a sawi a ni.

Tourism Dept chhinchhiah danin kum 2022-2023 chungin mi 2,20,000 in Mizoram an tlawh a, kum 2023-2024 ah mi 2,19,000 in an tlawh a, a. Nikum

Oct thla thleng khan Mizoram chhunga khualzin chhinchhiah zat hi ramdang mi 3,964 leh ramchhung mi 4,06,297 niin a vaiin mi 410,261 an ni.

Mizoram khaw hrang hrang a check gate tin atang ILP hmang a rawn lut zat hi mi 92,992 an ni a. Bairabi check gate atangin mi 40,072 an awm bawk a, Kanhmun check gate atangin mi 4278 awmin Vairengte check gate atangin mi 48,644 te an rawn lut a ni. Tourism department chhinchhiah danin foreigner tlawhtu mi 2,424 an awm a ni.

<><><>

VIKSIT

Viksit Bharat Young Leaders Dialogue, Youth Festival 2025 neih zawh taka Prime Minister hmaa presentation nei thei tura thlan team zinga tel Grace Lalrinpari Hauzel chuan Artificial Intelligence hmanga, kawng hrang hranga hmasawna thlen theih dan tur an duan te Prime Minister hnenah an thlen a,

“Tech for Viksit Bharat”tih thupui hmanga rawtna an siam te hian a huam zau hle a, rualbanlo hman theih tur Smart AI based wheelchair siam chhuah te leh rikrum thil thleng thuta chhanchhuah hna AI hmanga thawhna tur te telin Viksit Bharat hnuai hmalakna hrang hrang vil zuina tur tracker siam te a tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

POLICE RECRUITMENT

Mizoram Police chuan police constable 259 a la thar dawn a, tun thla ni 22 thleng a dil theih ang.

Mizoram Police in police constable an lak tur hi Un-Armed 51, Armed 200 leh mechanic 8 a ni a. Dil tur te chuan Mizoram Police department online portal mizopolicerec.in ah dil theih a ni a. Dilna thehluh kawnga harsatna nei tan tanpuitu tur Mizoram Police chuan a ruahman a, Police Headquarters, Aizawl SP pisa, Bawngkawn police station leh district headquarters zawng zawng SP pisa tinah tanpuitu an ruahman a ni.

<><><>

AH& VETY

Animal Husbandry & Veterinary Minister Pu C Lalsawivunga chuan AH&Vety farm Thenzawl a tlawh a, department hmalakna leh hmalak dan tur te a hmunah a enpui a ni.

Minister chuan Thenzawla Tin 57 a zau ran chaw hmun chu sorkar hmalaknain kum 2024 ah chuan Tin 70 hmun siam belhin Tin 127 hmun zet a zau a zauh a ni a ti a, Ran chaw ro hralh chhuah theih tura peih fel a nih tawh thu leh Kg 1,50,000 zet thar chhuah theih beisei a nih thu a sawi a. Ran vulhtute awlsam zawk nan ran chaw hi Thenzawl atangin Selesih AH&Vety farm - ah lak phei dan ngaihtuah mek a nih thu a sawi bawk.

Minister hian Zo-Sial humhalhna tur atana din Sial Farm hmunhma tlawhin hmathar lakna hrang hrang a enfiah bawk a, Mizo Sial leh Zo Vawk a ral mai lohna tura thawktuten an lo vulh chu thil lawmawm tak a ni, a ti a. He Sial farm ah hian tun dinhmunah Zo- Sial pariat vulh mek a ni a, ti pung zel turin department in hma a lak mek thu a sawi a ni.

AH&VETY Minister chuan Mizoram Artui a intodelh theih nan hma an la mek tih sawiin kumin aṅanga bul ṅan turin Arpui, a tui tam chi nuai khat vulh theihna turin hma an la mek a, a hmun hma tur pawh an nei ṅa a, thawktu an nei ṅa bawk a, Mizoram bung thar a kai ngei dawn a ni”, a ti a. Sial vulhtute tan Sial Chi liah tur Rashtrya Gokul Mission (RGM) aṅangin siam mek a ni a, hei pawh hi tih changtlun zel theih chuan Sial vulhtuten an ṅangkaipui hle dawn a ni, a ti bawk.

Pu C Lalsawivunga hian Kel Vulhna Hmun leh Vety Dilpui a tlawh bawk a. Thenzawl-a A.H.& Vety Department hmun hma tha tak an neih hi tangkai taka hman a nih theih nana ruahmanna hrang hrang kalpui mek a nih thu a sawi bawk a ni.

<><><>

PM

Prime Minister Narendra Modia chuan India-in chuan ramzauhna lam aiin hmasawna rilrua neiin hna a thawk a ti. Vawiina Indian Navy te hman tur Indo lawnglian pathum INS Surat, INS Nilgiri leh INS Vaghsheer a hawnaah he thu hi sawiin Pu Modia chuan Indo-Pacific huamchin chu him tak, inpawh tak leh hmasawn zel tura siam a duh ber a ti a. Vawiin chu India lawng sipaite tana ni ropui tak anih thu a sawi bawk a ni.

(Byte)

Vawiina lawnglian hawnaah hian Maharastra Governor C.P Radhakrishnan leh Maharastra Chief Minister Devendra Fadnavis te an tel a ni.

<><><>

SOUTH AFRICA GOLD MINE

South Africa-a dankalha rangkachak laihna khur chimah mi 36 an thi a, mi 82 chhanchhuah an ni. Police te sawidanin he khurah hian mi 100 chuang an la awm tih sawiin tunah hian chhanchhuah hna ngawrh takin thawh anih thu an sawi a. Tuna an chhanchhuah mi 82 te pawh hi dan kalha rangkachak khura an thawh avangin man nghal an ni an ti bawk.

<><><>

ARMY DAY

Vawiin Sipaite ni Army Day-ah President Droupadi Murmu, Prime Minister Narendra Modi, leh Chief of Defence Staff General Anil Chauhan te chuan ramchhung sipai huaisen tak takte leh sipai bang leh an chungte duhsakna chibai an buk.

President Draupadi Murmu-i chuan Indian Army ten ramchhunga buaina leh chhiatna a thlen changa mite chhawmdawl hna an thawk thin chu ropui a tih thu a sawi a. Ramchhung himna turin sipaiten dinhmun pawimawh tak an luah a ni a ti. Prime Minister Modia pawhin sipaite hamthatna turin hmalakna tam

tak an nei tih sawiin an chungte chhawmdawlina kawngah pawh theihtawp an chhuah a ni a ti a.

Chief of Defence Staff Genral Anil Chauhan pawhin ramchung sipai zawnzawngte duhsakna chibai a buk a ni.

<><><>